



Fotografija za istoriju gimnazije »Ognjen Prica«: razred IV-2 dugo neće biti zaboravljen...

Matematika! Koliko smo straha preživjeli pred svima koji su nam u školi pokazivali sve one silne brojke, učili nas sabiranju i oduzimanju, decimalima i razlomcima, logaritmima i geometriji. Nismo voljeli te profesore — matematike. Uh, pa jednog smo od muke nazvali — »Metla«! Kako je taj dijelio jedinice! Kako je lako na popravne obarao i — ništa od ljetnih ferija. Produ juli i avgust u nekom grču, strahu, neizvjesnosti, pomuti svu radost ta — matematika.

A za njih osamnaest iz IV<sub>2</sub>m, odjeljenja matematičkog smjera gimnazije »Ognjen Prica« u Sarajevu, matematika — kao pjesma, poslastica. Tačnije, ogromno zadovoljstvo, staviše — životno opredjeljenje. I sve je više mladića i djevojaka koji se priklanjuju tom bauku što to, ipak, nije.

#### UBJEDLJIVO PRVI

Od 25 mlađih zaljubljenika u matematiku sada ih je u ovom razredu osamnaest, ali zato već postoji šest razreda u kojima je ovaj predmet glavni, a koji predaju profesori Mira Savarić i Milorad Mijatović, a fiziku Huso Balić, dok je razredni starješina IV<sub>2</sub>m profesor Ilija Kačić, rekli bismo, tek nešto stariji od svojih učenika s kojima je od prvog razreda. Sada su on i njegov razred — primjer svima u školi, i ne samo u matematici, i ne samo u svojoj gimnaziji.

Pročuli su se lani kada su se međusobno dogovorili i prijavili za takmičenje — »Najbolje odjeljenje u zemlji«, koje su konkursom raspisali list »Mladost« i Drugi program Radio-Beograda.

Ubjedljivo su osvojili prvo mjesto u konkurenciji velikog broja razreda iz gimnazija, stručnih škola i škola za radnička zanimanja iz cijele Jugoslavije. Sakupili su ukupno 71.000 bodova, dok su drugoplasirani imali po 60.000. A nije se radilo samo o matematici, već i o društvenim aktivnostima, razrednim akcijama, učešću u saveznim akcijama, o prosječnoj ocjeni iz svih predmeta, o broju odličnih, vrlo dobrih... Ne, u IV<sub>2</sub>m nema dobrih. Tako je postao pobjednik. Jer: od njih 18 samo su dvoje imali vrlo dobar uspjeh, a 16 — odličan! Prosječna ocjena, vjerovali ili ne — 4,89! Možda bi, ili sigurno bi bila i veća da razrednik nema vrlo strog kriterij, a on predaju matematiku.

## NA ČASU SA NAJBOLIJIM RAZREDOM U JUGOSLAVIJI

# VELIKA LJUBAV IV2

Osamnaest djevojaka i mladića, učenika IV-2 razreda sarajevske gimnazije »Ognjen Prica«, sa prosječnom ocjenom 4,89, najbolji su učenički kolektiv u zemlji. O njima govori i ovaj tekst.

Upravo u činjenici da ovi učenici, maturanti, uskoro akademski građani, nisu »specijalisti«, nadareni i zagrijani samo za matematiku, u tome je njihov poseban kvalitet, nešto zbog čega zaslужuju iskrena i velika priznanja.

#### SVE IH ZANIMA

— Sto se tiče mog predmeta, najbolji su u gimnaziji — kaže Milojka Despot, profesor srpskohrvatskog jezika.

— U svojoj praksi još nisam našla na takve učenike, koji imaju neobično ozbiljan stav prema naući, posebno prema predmetu koji ja predajem, istoriji — veli profesorica Samija Jelić.

Hvali ih i profesor engleskog jezika, fizike, svi se o njima lijepo izražavaju, o čemu, uostalom, najbolje govore ocjene.

Ovi učenici druguju s knjigama na najbolji mogući način, ali oni stignu i na druga mesta. Sve ih zanima.

Na sportskom prvenstvu svoje ško le drugi su u košarci. Dva brata Melera redovno treniraju u ekipi »Sarajeva«.

Tahir Mahmufendić će se uskoro boriti za titulu šahovskog majstorskog kandidata, član je »Iskre«, pravaka Republike.

Miodrag Škrbić intenzivno trenira sa fudbalerima »Željezničara« i — kuca na vrata prvog tima.

Dženan Muminović interesuje klasična muzika i na takmičenju Mušičke omladine »Mocart 72« bila je u gimnazijskoj ekipi koja je osvojila prvo mjesto, a pored nje sačinjavali su je još: Vladislav Pogačić, Jasna Sahbegović i Nemanja Selimović. U sličnoj jugoslovenskoj manifestaciji, »Šopen 73«, Muminovićeva je sa Selimovićem i Zlatkom Kosićem dospjela do polufinala.

— Ova takmičenja su lijepa dok ne postanu zabava za televizijske gledaoca. Od mogućih 30 poena osvajali smo najmanje 28, ali smo poraženi zbog jedne tehničke smetnje u studiju.

#### RAČUN VJEROVATNOĆE...

I tako, na svim poljima, mlađi ljudi IV<sub>2</sub>m gimnazije »Ognjen Prica« su zapaženi. Od njih 18 već ih je trinaest u članstvu Saveza komunista.

Sve, sve, ali — matematika je nji hova najveća ljubav. Od malih nogu, tako reći.

— U meni se pojavilo interesovanje prema brojevima čak prije nego što sam pošao u osnovnu školu, tako da sam i starijem bratu pokazivao matematiku — kaže Milan Saravolac, — Još nisam postigao onoliko koliko sam želio u matematici.

— Matematika je više nego umjetnost. Nema ništa bez matematike, ni ideje, čak ni apstrakcije, ni pravog poimanja logike.

U ovim riječima Dženane Muminović sadržan je, manje-više, odgovor svih.

Kakva je to matematika što je izučavaju učenici matematičkog smjera? To nam objašnjava daroviti prosvjetni radnik, entuzijasta, koji je ovaj predmet studirao u Sarajevu kod Šefkije Raljevića, Vere Šnajder, Mahmuta Bajraktarevića, Steve Klašnje, Radomira Živkovića:

— Učenici matematičkih odjeljena savladaju sav program redovne gimnazije — kaže razredni starješina IV<sub>2</sub>m Ilija Katić. — Ali, oni imaju i kombinatoriku, račun vjerovatnoće, teoriju relativnih brojeva, diferencijalni račun na višem nivou, moderne kurseve iz matematike na osnovu visokih dostignuća francuskih naučnika. Upoznaju se sa astronomijom u sklopu fizike, sa kosmičkim zakonima. Imaju i poseban predmet informatiku, a rade na računskim mašinama, tako da bi već nakon završetka gimnazije mogli da rade kao tehničari — programeri, jer se služe kompjuterima, a nezamisliv je budući stručnjak koji to ne zna.

#### KUDA SUTRA!

Od ukupno 30 časova nedjeljno sedam je iz matematike, s tim što iz tehničkog obrazovanja, muzičkog i likovnog vaspitanja imaju kurseve, tako da ništa ne izgube, steknu potpuno isti kvantum znanja kao i ostali, jedino iz matematike — mnogo više.

Njihova matematika je programska drugačija, mnogo teža, uče je svaki dan, teške probleme rješavaju svakodnevno, ne dolaze na časove bez rješenja, makar ga tražili zajednički, čak i posredstvom telefona, a oni i inače rade kolektivno.

I to što su odskočili nije ih promijenilo u odnosu na druge. Čak, postali su uzor, svi žele da krenu njihovim primjerom, zato gimnazija »Ognjen Prica« i ima veliki broj izvrsnih učenika.

Najzad, da predstavimo te odlične učenike za koje je matematika poetica, da ujedno saopštimo njihove želje što će da studiraju:

Dženana Muminović, atomska fizika, Biljana Bilić, vjerovatno matematika, Damir Tkalić, mašinstvo, Miodrag Vujanović, Milan Saravolac, Emir Hadžihasanović, Miodrag Škrbić, Gradimir Starović, Miljoš Bjelica, svi elektrotehnika, Gordana Nikolić, arhitektura, Milenko Bilić, arhitektura, Dominko i Stjepan Meler, građevina, Sanja Hasanbašić, vjerovatno farmacija, Tahir Mahmufendić, vjerovatno matematika, Slavenko Plavan, Zlatko Delić, Snežana Andraković, zasad neodlučni.

Ipak, sutra, kroz nekoliko godina, od svih ovih mladića i djevojaka možemo očekivati, nove, vrijedne stručnjake, buduće naučne radnike.

Zasad ovom divnom razredu i s naše strane jedna velika-peticia.

**Željko RODIĆ**